

BONERIANO®

Mi a arepentí hopi bi-aha di a papia, pero di a keda ketu nunca..

EDITOR:
Bonaire Communication Services N.V.


Djárason 8 novèmber 2023 | Preis: \$1.25

KRÍTICA SERVISIO SZW

Servillia Mercera a celebrá 100 aña



Servilia Selestina Mercera-Sint Jago a kumpli 100 aña. E selebrashon a tumá lugá na Kas di Kuido, kaminda e ta permanesé. Pader Baak tabata presente pa asina a bendishoná e kumpleañera, miéntras Grupo Tutti Frutti a sòru pa e parti musikal.



Pa protehá otro bestia:

Legalidat tiramentu di kachó

KRALENDIJK- “Sí un kunukero tin pèrmit i e tene su mes na e kondishonnan stipulá, ta kompletamente legal pa e tuma akshon pa protehá su bestianan”,

bosero di Kuerpo Polisial Hulanda Karibense (KPCN) ta splika. KPCN ta reakshoná riba e artíkulo publiká den BONERIANO ku e título ‘Ta basta awor’.

Den e artíkulo aki algun kunukero hopi indigná, a duna nan opinion tokante e pèrdida i daño ku nan tin na momentu ku kachó mata nan bestianan. Últimamente tin oumento di e insidentenan aki.

Polis a duna di konosé di ta na haltura di e situashon preokupante aki. Alabes ta splika loke tin pará den lei na momentu ku un kunukero disidí na tira kachó mata.

“Den e areglo di arma di kandela di BES, artíkulo 3 ta prohibí pa ta den posesion di arma di kandela òf munishon di arma di kandela”, e bosero ta splika. Sinembargo tin algun eksepsion. “Bou di insiso 2 punto 5 tin poné ku un persona por risibí outorisashon spesial dor di gezaghèber. Huntu ku esaki ta bin algun kondishon.” Un kunukero por tin un arma di kandela pero esaki mester ta solamente denter di su tereno i nan mester hasi uso di dje solamente pa e motibu ku nan a indiká den petishon di nan pèrmit. “Pa mayoria di kunukero esaki

ta pa protehá nan bestianan kontra kachónan ku ta kana lòs. Sí ta importante pa mensioná ku mester hasi notifikashon na momentu ku usa e arma di kandela. Ademas mester tene kuenta

ku na momentu tira e kachó pa protekshon di bestianan mester ta den akto.

Di e manera aki por konstatá ku a tira e kachó pa protehá otro bestia”, bosero ta agregá.



Sushi kantu di kaminda

KRALENDIJK- No por konklui otro, ku apesar di tur intento pa tene Boneiru limpi, tin algu siudadano ku ta skohe pa susha nos isla. Konsientemente ta tira

sushi den mondi òf kantu di kaminda.

Por mira kon a tira sushi kantu di kaminda den e ruta di Skol amplio Papa Cornes pa Hato.



Yuda nos tene nos playanan limpi



www.extraboneiru.com

èxtra
...number 1

www.extraboneiru.com



Pronóstiko di tempu pa Boneiru

Djars 07 te Djárason 08 Novèmber 2023
Algun áwaseru, posiblemente ku mal tempu

Ta parsialmente te hopi nublá i de bes en kuando lo tin algun áwaseru, posiblemente ku mal tempu. Bientu for di ost ta moderá, forsa 3-4. Durante di áwaseru tin chens pa ráfaga di 50-60 km/ora i bientu por bira sùitwèst. E temperatura máksimo lo ta aproksimadamente 30°C, e temperatura mínimo mas o ménos 25°C.

Altura di ola: 1.0-1.5 m (3-5 pia).

* Altura di ola válido pa laman grandi

KRÍTIKA SERVISIO SZW

KRALENDIJK - “Servisio di SZW ta un porkeria. Por gaña pueblo ku tur sorto di rapòrt pero e ta keda un porkeria”, ta kritiká fuerte di un siudadano. Mester menshoná, riba mesa di redakshon di BONERIANO ta subi vários reklamo tokante disponibilitat via telefòn i meil di Unidat Asuntunan Sosial i Labor (SZW) di Rijksdienst Caribisch Nederland (RCN). “Mi a manda 3 mensahe pa nan, despues di 2 luna ainda mi no a haña un kontesta.” Ta trata di un situashon den kua e siudadano aki no a risibí su penshon di behes na tempu. Pa motibu di algun inklaridat pa ku su number di kuenta di banko. Na dado momentu SZW a depositá e sèn riba un kuenta robes. Lokual a sòru pa basta iritashon serka e siudadano, ta e echo ku SZW no a reakshoná por eskrito riba su mensahenan.

Un otro siudadano ta reklamá di a manda dokumentunan pa SZW via meil pero nunca a haña konfirmashon. “Despues nan ta bisa mi no a manda, pero ta boso no reakshoná nunca riba

mi mensahe”, e persona aki ta reklamá.

Un siudadano ku no a risibí un kontesta, a disidí na skirbi direktor di RCN, Tim Muller. BONERIANO ta disponé di dokumentashon den kual Muller a kontestá ku e funshonario di keho lo tuma kontakto ku e siudadano pa atendé e situashon. “Nunca mi a tende algu di e señora misterioso aki.”

No ta promé bia ku tin kritiká konserní servisio di SZW. Aña pasá SZW a laga hasi un investigashon kualitativo pa sa kon e klientenan ta eksperensiá servisio di e unidat aki. Nan a duna di konosé ku ta diskutí resultadonan di e investigashon ampliamente ku e kolaboradónan durante dianan di tim den desèmber 2022. A base di esaki tambe ta formulá un plan di akshon i mehorashon konkrito, kaminda ta tene kuenta ku loke ta realisabel riba término kòrtiku i término mas largu. Mientrastantu nos ta kasi un aña despues i ainda ta skucha mesun tipo di reklamo.

BONERIANO a aserká SZW pa haña mas

klaridat tokante e proseso pa mehorá nan servisio. Nan mes a anunsiá tokante un plan di akshon, pues awor ta esensial

pa splika komunidad kiko esaki ta enserá. E bosero di SZW a palabrá ku pronto lo trese mas informashon i klaridat

konserní mehoransa di servisio di unidat SZW. BONERIANO ta keda vigilá esaki i ta publiká mesora nan reakshon.



Komparashon preis di komestibel

KRALENDIJK -- E komparashon di preis di komestibel den luna di òktoberta enserá e preisnan na toko i minimarket na Boneiru. A bishitá 18 estableimentu den promé siman di òktober. Tur estableimentu a duna nan koperashon pa registrá e preisnan di produkto ku tin den e makutu básiko di Tienda pa Konsumidó Boneriano

A hasi komparashon di preis di artíkulonon for di e makutu básiko i a trata na registrá preis di 139 diferente produkto durante di e promé siman di òktober.

Ta rekomendabel pa tuma bon nota di e lista di komparashon publiká di preis p’asina por tene kuenta ku diferensia den

preis di komestibel na momentu di kompra. Di e forma akí por hasi eskoho ku ta kumbiní mas.

E komparashon di preis ta limitá na produktonan di e makutu básiko.

A kompará preis di minimarket ku toko ku e promedio di preis di supermerkadu di mart pa òktober di e mesun artíkulonon i a bin resultá ku den minimarket ku toko, e preisnan ta varia entre 1% te 7% mas haltu ku supermerkadu grandi.

Tin ku bisa sí ku na e otro banda ta posibel pa hasi kompra den purá pegá ku kas i bo ta spar riba sèn di gasolin.

Etòp 3 estableimentunan ku a resultá ku e mihó preis den e kategoria di e produktonan akí ta Union

ku 24 produkto, mas bien den kategoria di artíkulo pa beibi, fruta i berdura, TESCO ku 21 produkto, mas bien bou di e kategoria di belèg, fruta i berdura, sòpi ku produktonan di grano i hariña i Ideal Supermarket ku 12 produkto, mas bien bou di e kategoria di artíkulo pa bebe, berdura i fruta.

E tòp 3 estableimentunan ku a resultá mihó surti den e kategoria di produkto ta Jai Xing ku 87 produkto, Ideal Supermarket ku 79 produkto i Union ku 73 produkto. Durante di e komparashon di preis no a tene kuenta ku higiena di e estableimentu, kalidat di produkto, ni pais di eksportashon.

OPTENIBEL NA

Kuranderia popular

Ofisina di FuHiKuBo

Ofisina di Extra

Del Mar BV

\$17,50

Natural i spiritual

Un proyekto di Unesco i FuHiKuBo

HUSTISIA



Ainda problema den tráfiko

KRALENDIJK- Riba djadumingu 5 di novèmber, alrededor di 12.20 or di mardugá, a detené un hòmer di inisial G.T.P. di 62 aña di edat pa manehá bou di influensia. E sospechoso a bèk ku su vehíkulo i dal den un outo riba Bulevar Gobernador N. Debrot i a trata na kore bai.

Despues di un investigashon a resultá ku e hòmer ku a okashoná e aksidente tabata bou di influensia di alkohòl. Pa e motibu aki, a detené e sospechoso. Durante un kòntrol riba dokumentonan nesesario a resultá ku e shofùr ku a okashoná e aksidente, no por a mostra un reibeweis bálido pa motibu ku na mart último, polis a kita su reibeweis pa motibu ku e tabata manehá bou di influensia.

Aksidente ku herido

Riba djadumingu 5 di novèmber, alrededor di 3.35 or di mardugá, un aksidente a tuma lugá riba Bulevar Gobernador N. Debrot.

Shofùr di un pikòp 'flatback' ku tabata kore for di Playa direkshon Hato, a pasa stret den un bògt i aksidentá den un spil di tráfiko i finalmente den un muraya i un palu kantu di kaminda. E shofùr a resultá heridá i ambulans a transport'é pa hòspital pa tratamentu médiko.

Diferente but pa violashon den tráfiko

Entre djárason 1 di novèmber i djaluna 6 di novèmber a duna diferente but pa violashon den tráfiko durante kòntrolnan rutinario.

E butnan tabata pa lo siguiente:

5x pa manehá sin reibeweis bálido;

4x pa manehá sin seguro bálido;

1x pa manehá sin plachi di number;

3x pa manehá sin hèlm bistí;

2x pa tene telefòn den man miéntras ta manehá;

2x pa kore den un kaya será pa tráfiko;

5x pa stashoná robes;

2x pa manehá sin faha di seguridat bistí. KPCN ta hala atenshon di un i tur pa nan tin e dokumentunan nesesario, na òrdu.

Tambe ta konsehá estriktamente pa kumpli ku e reglanan di Lei di Tráfiko.

Ku esaki bo tambe ta kontribuí na un tráfiko seif i sigur riba e isla.

Bo no ta kumpli ku reglanan?

Bo por haña un but. E suma di un but pa e violashonnan menshoná ta varia entre \$30 te ku \$225.



Kasonan di ladronisia

KRALENDIJK- Den oranan di mardugá riba djabièrnè 3 di novèmber, un kaso di ladronisia ku violensia a tuma lugá riba e sitio di stashoná outo na Plaza Reina Wilhelmina. Un hòmer ku tabata kore riba un baiskel a yega serka e víktima i puntr'é pa sèn. Na momentu ku e víktima a kue su telefòn pa yama polis, e sospechoso a ranka e telefòn i a kore bai. Ta investigando e kaso.

Alrededor di 3'or di

mardugá riba djadumingu 5 di novèmber, a detené un hòmer di inisial R.M.D. di 52 aña di edat den Centrumgebied pa ladronisia.

Riba djabièrnè 14 di yüli, e sospechoso a bai ku algun saku di karni sin paga for di un supermerkadu situá na Kaya Industria.

Un patruya a rekonosé e sospechoso i a detené relashoná ku e kaso. Investigashon den e kaso ta kontinuá.

Kambio bandera na Fort Oranje

KRALENDIJK- Por nota ku resien a kambia e posishon di palu di bandera na Fort Oranje. Ya pa algun luna por mira trabounan di mantenshon na e edifisio di korte di hustisia ta progresando. Ta konosí ku mester di mantenshon intensivo na e edifisio na Fort Oranje.

Awor a kambia e palu di bandera. Antes e banderanan tabata na porta di Fort Oranje.

Awor esaki ta pegá ku e

kayonnan, paden di e fòrti.

No opstante tur intento pa restourá e edifisio aki, tur kos ta indiká ku Korte ta bai un propio Kas di Hustisia, un edifisio den kua lo ubiká partnernan den kadena di hustisia. Pues un edifisio kolektivamente pa Korte, Ministerio Públiko, Reclasing i probablemente otronan ku tin di aber ku hustisia.

E potrètnan ta ilustrá posishon di palu di bandera.



“Compagnie in de West” ta hasi rotashon

KRALENDIJK - Durante un seremonia Militar kòrtiku, “Compagnie in de West Rotashon 43” a traspasá su tareanan na e siguiente unidat, Rotashon 44. E Komandante nobo Kapitan Siebe a remplasá su Antesor Kapitan Hans, durante un traspasso tradishonal asina yama ‘peddeloverdracht’. Rotashon 44 ta keda kuater luna den Region Karibe Hulandes. E trupanán aki ku e nòmber ‘Charlie “Tijger” Compagnie’ no

ta unu deskonosí den region. Na 2015, 2018 i 2020 tambe nan tabata e trupanán di Ehérsito den Region Karibe Hulandes. Durante e periodonan aki e “Tijgers” diferente biaha a duna sosten na outoridatnan lokal, entre otro den búskedanan di personanan pèrdí i apoyá durante e pandemia di Corona.

Kapitan Hans ta wak bèk riba un periodo speshal: “Komo unidat nos tabatin un tempu fantástiko akinan, durante kua nos por a hasi hopi ehersisio. Ku un

Compagnie relativamente nobo nos tabata por a trein te yega na nivel di pelotón i nos tabata prepará pa eventual despliegue durante e temporada di orkan. Nos tabata por a hasi e loke os a bini p’e i nos a sinti nos mashá bon biní riba e islanan den Region Karibe Hulandes.”

Kapitan Siebe ta antisipá di por trein ku su hendenan den Region Karibe: “Nos ta honrá di un biaha mas por duna nos kontribushon na Kòrsou, i posiblemente restu di Region Karibe.

Si en kaso un apelashon keda hasi na nos, nos ta pará klá pa yuda kaminda ta nesesario i lo tin plaser den traha huntu ku sosionan lokal. Nos tin hopi hende yòn serka nos ku lo permanesé riba e isla pa di promé biaha. Tambe nos ta antisipá, un periodo speshal durante kua nos, ademas di ta pará klá pa eventual sosten, nos lo reta nos mes riba tereno di treinen den sirkunstanshanan ekstraordinario ku Region Karibe Hulandes ta brinda nos.” “Compagnie in de

West (CidW)” ta e unidat permanente di Ehérsito Real den Region Karibe Hulandes, ku por keda desplegó pa un variedat di tarea. E 4 lunanan benidero Compagnie ta trein tantu na Aruba, Bonaire komo Kòrsou. Compagnie “Charlie “Tijger” normalmente ta ubiká na Schaarsbergen, na Hulanda. Un unidat di infantería konsistiendo di diferente ekspertisio militar, manera por ehèmpel, genionan, informashon i frankotiradónan.

Greenpeace di shòk

Pa añanan largu Den Haag a nenga peliger di klima

KRALENDIJK – Kalkulá riba e dia ku e gabinete a anunsiá ku ta bini plan di klima pa Boneiru, Sint Eustatius i Saba, Greenpeace ta kulpá Den Haag pa añanan largu di a nenga e peligernan pa e islanan di kambio di klima.

Gobièrnu ya pa hopi aña tabata na altura di risikonan ku kambio di klima ta trese kuné pa Boneiru, Sint Eustatius i Saba. Esaki a sali na kla for di dokumentonan ku Gobièrnu a hasi públiko, despues di un petishon Woo di Greenpeace.

Añanan largu Estado apénas a tuma medida, apesar di e noshon di e menasa oumentando dor di kambio di klima.

Eefje de Kroon, lider di kampaña derecho di hustisia klimatológiko di Greenpeace: “Mi ta di shòk pa lesa ku e peligernan pa e islanan ya pa hopi aña ta konosí, pero kasamente a tuma akshon. Gobièrnu tin e derecho pa protehá su siudadanonan aktivamente kontra e konsekuensianan di kambio di klima. E obligashon akí ta ankrá den e tratado Europeo pa

derecho di hende. E krísis di klima ta toka tur hende, sea awor bo ta biba na Boneiru, Ameland, òf Valkenburg.”

Den un di e dokumentonan pidí tin pará ku e protekshon legal kontra inundashon no ta nesesario, pasobra un desaster di emergensia di awa ainda no a tuma lugá. Islanan BES e último siglonan no tabata problema ku desaster di emergensia di awa. Situá riba e superfisie di laman i ku esaki e falta di poldernan hundu pa esaki, ta un deklarashon

geográfiko importante. Dor di esaki no tabatin ningun indikashon pa tuma medida i dor di esei stipulá pa medio di lei.

For di e investigashon di Vrije Universiteit pa e konsekuensianan di kambio di klima pa Boneiru, parse ku un sinku parti di Boneiru ta keda menasá di keda chupá dor di e superfisie di laman na fin di e siglo akí, refnan di koral ta dispersé i olanan kayente

ta oumentá. Dor di esaki habitantenan di Boneiru i Greenpeace na mei a manda un karta pa Gobièrnu Hulandes, den kua nan ta eksigí ku Gobièrnu Hulandes ta protehá Boneiru kontra e konsekuensianan di kambio di klima. P’esei Hulanda mester hasi lihé pa baha e emishon di CO2 i tuma medidanan konkreto pa protehá e isla i su habitantenan.



8 di Novèmber 2023

“Esun ku bini serka Mi, ... mester hisa su krus i sigui Mi ...”
(cf Lukas 14,26.27)

Den bida tin hopi kontradikshon. Un di esnan mas remarkabel ta e echo, ku den hopi kaso ora nos eksperiensia kualkier prueba, òf situashon inkómodo, suseso di preokupashon, di fèdrít òf otro, nos ta buska nos refugio serka Señor. Ta parse ku nos ta spera ku Señor ta restourá nos realidat imediatamente. Hesus ta laga nos komprondé ku ora nos bai serka djE, nos mester sigui karga nos krus. (cf Lukas 14,26.27)

Hesus konosé nos doló i sufrimentu, pasobra E mes a sufri. (cf Hebr 4,14-16) Sinembargo Hesus ta pèrmití nos eksperiensia e situashonnan aki, p’asina nos yega mas lihé serka Tata, ku ta nos fortaleza. I pa medio di e fe aki, nos ta keda fortalese espiritualmente pa “enfrenta tur situashon ku ánimo, pa medio di Esun ku ta duna nos forsa.” (cf Fil 4,13)

Señor, hasi mi fe madurá i fortalezé mi, pa mi por karga mi krus i sigui Bo.
1L Rom 13,8-10; Salmo 112,1-2.4-5.9; Ev Lukas 14,25-33

005999-522-4056 Un Snechil Pan unsnechilpan

Con Dulce Services N.V.
ta buska
- 3 metselaar

Pa mas inf. yama # **795-7545**

Akshon rápido ta kondusí na detenshon

Droga i outo konfiská

KRALENDIJK -- e outo akí. Durante un kontròl di un boto, Wardakosta a nota un outo sospechoso. Kuerpo Polisial a risibí notifikashon di parti Wardakosta tokante Algun momentu despues a identifiká e vehíkulo sospechoso riba Kaya Neerlandia i duna e shofür señal pa stòp pa un kontròl. Durante e kontròl a topa entre otro supstansianan probablemente narkótiko i arma blanku. A detené un di e pasaheronan en konekshon ku e kaso.

Na e momentunan (Fuente / Foto: akí e kaso ta bou di LIVE99FM) investigashon.



Mensaje de la Virgen Maria Reina de La Paz desde Medjugorje

25 de SEPTIEMBRE de 2023

“Queridos hijos, los invito a una oración fuerte. El modernismo quiere introducirse en sus pensamientos y robarles la alegría de la oración y del encuentro con Jesús. Por eso, queridos hijitos míos, renueven la oración en sus familias, para que mi Corazón maternal esté gozoso como en los primeros días cuando los elegí y la oración resonaba día y noche, y el cielo no permaneció en silencio sino que concedió en abundancia paz y bendición a este lugar de gracia.

¡Gracias por haber respondido mi llamado!” **09/25**

DIOS NUNKA TA LAT

Skritura: Juan 11:1-44

“Jesus a bis'é: “Mi no a bisabo, si bo kere, lo bo mira e gloria di Dios?” Juan 11:40(BS)

Marta a bisa: “Señor, ya e mester ta hole malu kaba, pasobra e tin kuater dia morto.” (versíkulo 39) Marta i Maria a manda bisa Hesus ku Lazaro ta malu (v.2). Dikon? Pasobra nan sa ku ora Hesus yega E ta kur'é. Kier men ku nan a konfia i kere ku Hesus por sana nan ruman ora e ta na bida. Ma duda a dreña ora ku nan ruman a muri i nan a der'é. Hesus kier a muestra nan algu muchu mas maravioso, ma nan no a comprendé esei.

Situashon difísil ta presentá diripiente i nos ta roga Dios pa un solushon i un kontesta awor. Nos ta lubidá ken Dios ta; E ta Dios di milagernan!

Ma Dios ta traha i aktua den Su tempu perfekto. Su plan i propósito ta pa yuda nos rekonosé ken E ta, kiko E ta kapas pa hasi i ku E ta Todopoderoso.

Ban konfia Dios mas i demostrá nos fe den tur situashon. No semper ta fásil ma ku Kristu Hesus e ta posibel.

Algun tep pa ora nos ta spera riba Dios:

- Semper ta kontentu – 1 Tesalonisensenan 5:16
- Semper hasi orashon – 1 Tesalonisensenan 5:17
- Semper gradisí promé ku kontesta yega, esaki ta fe – 1 Tesalonisensenan 5:18
- No stroba e Spiritu Santu di traha, dor di tuma e asunto den nos mes man – 1 Tesalonisensenan 5:19

Dios nunca ta lat; ta nos mester spera, kere i konfia den Su tempu!

Gilda Beukenboom-Sintjago

Produkshon PGM

Programanan di Bonaire.tv

TELBO kanal 70
Flamingo TV kanal 23

Djársason 8 novèmber 2023

12.00 Herensia:	Juanita Sira Molina
13.00 Aki Boneiru:	George 'Kultura' Thodé
14.00 Herensia:	Sally Pieters
15.00 BAPA:	Riet Sealy
16.00 Aktualidat:	Amilea Pieternella
17.00 AkiAruba:	Hazaña mega museo (Heintje Ras)
18.00 Herensia:	Lorensia `Nora` Reinita i Thomasa `Mosa` Martina
19.00 BAPA:	Punta blanku
20.00 Aktualidat:	Hennyson Thielman
21.00 Dokumental:	Washington
22.00 Herensia:	Maria Odencia Thomas-Semeleer
23.00 BAPA:	Peter van de Mosselaar

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.



Integrity Summit Dutch Caribbean

Promoshon di ekspertisio pa ku integridat

KRALENDIJK- Partisipante prosedente di organisashonnan di tur seis isla di e parti karibense di Reino i di ministerio di Asuntunan Interno i Relashonnan den Reino (BZK) a papia ku otro tokante promoshon di ekspertisio durante e promé ‘Integrity Summit Dutch Caribbean’ na Kòrsou di

30 di òktober te ku 3 di novèmber. A palabrá ku ta bin un plataforma pa interkambio di ‘best practices’ i eksperensia diario ku e meta pa alsa nivel di ekspertisio i promové kolaborashon riba tereno di integridat den Reino. Alrededor di 30 partisipante di 15

diferente organisashon gubernamental a akordá pa lanta un plataforma den kua tantu e paisnan outónomo komo Hulanda Karibense ta partisipá i den kua periódikamente ta interkambiá konosementu i eksperensia tokante promoshon di integridat den gobièrnu, entidatnan afiliá na gobièrnu i

komunidades en general. E énfasis al respekto ta riba promoshon di ekspertisio di organisashonnan lokal ku ta atendé ku esaki. Ta bin tambe un vishon pa futuro pa sigui traha konhuntamente riba integridat na boka di trabou den organisashon gubernamental den e parti karibense di Reino.

Tabatin entre otro orador presente di ‘Huis voor Klokkenluiders’, Krus Kòrá, ‘Bureau Integriteit Amsterdam’, ‘Nyenrode Business Universiteit’, ‘Dienst Justitiële Inrichtingen’ i direktorado ‘Ambtenaar en Organisatie’ di ministerio di BZK. Eks gezaghèber i miembro di Kolegio supervishon finansiero (Cft), Glenn Thodé, a habri e kumbre ku un diskurso tokante integridat den e parti Karibense di Reino.

Boneiru i Rijksdienst Caribisch Nederland, funshonarionan di integridat, investigadónan, personanan di konfiansa i di e Entidatnan Públiko Saba i Sint Eustatius, Warda Kosta Karibense, Korte Komun di Hustisia Karibense, Ministerio Públiko Karibense, Kuerpo Polisial Hulanda Karibense (KPCN), Instituto Hudisial Hulanda Karibense (JICN), Representante di Reino, Koninklijke Marechaussee (KMar), Ministerio di Maneho di Governashon, Planifikashon i Servisio Públiko i Ministerio di Hustisia di Kòrsou.

Promoshon di ekspertisio ta esensial, pa motibu ku ta importante pa e parti karibense di Reino traha riba e tarea pa pone integridat na nivel òf mantené integridat den organisashonnan gubernamental. Ta bai den esaki partikularmente pa e grado ku e organisashonnan ta kapas pa kombati iregularidat (finansiero) (manera froude i korupshon) i forman di anda indeseá (manera abuso di poder, insulto, diskriminashon, intimidashon i eksklushon), tantu preventivo komo reaktivo.

Organisashon

E idea pa e ‘Integrity Summit Dutch Caribbean’ a nase for di un nesesidat di e kolaboradónan di integridat di e parti karibense di Reino mes. Ministerio di BZK i SRA-Caribbean & Partners NV, un ofisina lokal ku ta spesialisá den entrenamentu i konseho riba tereno di integridat i kumplimentu, a organisá e kumbre.

E kumbre, ku a tuma lugá pa di promé bes, ta sirbi komo un trampolin pa un forma di kolaborashon mas struktural. E organisadónan ta papia di un siman eksitoso ku a ser risibí ku hopi entusiasmo.



Trabou intensivo na Fèlt Pariba

KRALENDIJK- Trabou di mantenshon i pa drecha fèlt Pariba di Rincon, ketu bai ta tuma lugá. Ta traha intensivo i ya por nota un progreso supstansial. E potrètnan ta duna un impreshon.



Kompartí eksperensia

“No por suprayá sufisientemente importansia di e ‘Integrity Summit’. Porfin tin un enkuentro di e kuater paisnan den Reino ku integridat sentral riba agènda. Abitantenan di e islanan den e parti karibense di Reino ta anhelá pa tin mandatario-, funshonario- i ámtenarnan íntegro. Pa esun ku ta traha riba promoshon di integridat ta di sumo importansia pa por tin un infrastruktura pa kompartí konosementu i eksperensia ku otro i pa duna otro sosten i kolaborá ku otro. E union di forsa pa medio di e promé ‘Integrity Summit’ ta duna mi e speransa riba un futuro ku mas integridat den komunidades,” segun Thodé.

Promoshon di ekspertisio

Meta prinsipal di e konferensia tabata pa sera konosí ku otro i promové ekspertisio di kolaboradónan di e ofisinan di integridat di Aruba, Sint Maarten, Entidat Públiko

Pa islanan traha riba nan propio plan di klima

Gabinete a pone un mion euro disponibel

K R A L E N D I J K
-- Boneiru, Saba i Sint Eustatius, ta bai traha huntu ku Gabinete riba nan propio plan di klima. Pa esaki Gabinete ta pone 1 mion euro na disposishon. E plaka ta bin riba e rekursonan ku ya ta disponibel pa adaptashon i mitigashon di klima. Kuné e islanan por kuminsá formulá e plannan, di kua e meta ta pa nan ta kla na 2024. Esaki por lesa den e reakshon di Gabinete riba e rapòrt 'Nunka ta muchu lat' ku a bai Parlamento djamars.

Ora di traha e plannan ta tene kuenta ku sirkunstansia lokal. Asina por ehèmpel Boneiru ta deseá pa traha riba un plan di klima via di un mesa di klima. Saba i Sint Eustatius ta preferá pa

traha direktamente riba un plan, tumando na kuenta e tamaño limitá di e islanan akí.

Huntu ku e islanan ta bai kuminsá ku diferente akshon. Manera por ehèmpel, embolbí di habitante den e plannan di klima, formulá preguntanan di konosementu i pèrkurá pa dunamentu di bon informashon. E meta prinsipal ta pa den 2024 realisá tres plan di klima ku tin apoyo, pa e islanan na Karibe Hulandes.

E un mion euro pa kuminsá ku e plannan di klima, ta bin di e ministerionan di infrastruktura i maneho di awa, asuntunan ekonómiko i klima i asuntunan interno i relashon den Reino. Ta stipulá e montante akí

formal den e presupuesto di primavera i etabinadishonal riba e mas di 33 mion euro ku ya ta disponibel, pa hasi produkshon di elektrisidat riba e tres islanan mas duradero.

Mas aleu Gabinete a primintí pa pèrkurá pa un punto di kontakto ku ta sostené e islanan ku e kordinashon entre e diferente ministerionan embolbí. E próksimo lunanan ta bai deliberá kon ta bai konkretisá esei.

Sekretario di Estado van Huffelen: "Senarionan di klima resien ta mustra ku Boneiru, Saba i Sint Eustatius, awor i den futuro, ta bai haña nan mes konfrontá ku konsekuensianan di kambio di klima. Manera por ehèmpel subida di nivel di

laman, tormenta pisá ku ta bai oumentá, subida di temperatura i pèrdida di refnan di koral vulnerabel. Mi koleganan Rob Jetten di klima i energia i Mark Harbers di infrastruktura i maneho di awa i ami, ta deseá gustosamente di sostené e kolegianan ehecutivo di Boneiru, Saba i Sint Eustatius, den nan aserkamentu di e retonan riba tereno di siguridat, salubridat, garantia di eksistensia,

ekonomia i biodiversidat, ku nan ta enfrentá komo konsekuensia di kambio di klima."

A pidi Ed Nijpels pa duna un konseho tokante organisashon di un mesa di klima na Boneiru i si un struktura asina ta aplikabel pa Saba i Sint Eustatius. Un próksimo Gabinete lo disidí kon realisashon di e plannan di klima nobo ta bai bira i kua rekursonan adishonal ta bai pone disponibel pa Karibe Hulandes.

Anunsio di kambio di nòmber di Prins Bernhard Cultuurfonds Hulandes pa 'het Cultuurfonds'

Awe direktiva di Prins Bernhard Cultuurfonds Caribisch Gebied (PBCCG) a tuma nota di kambio di nòmber di e hermana organisashon Hulandes. Di awor pa dilanti na Hulanda ta usa solamente e nòmber 'het Cultuurfonds'.

E motibunanan ku a kondusí na e kambio aki ta unu pa direktiva di PBCCG tambe pensa riba un desishon tokante uso di e nòmber di e Fondo Kultural Karibense.

Asina direktiva tuma un desishon, tur stakeholders i públiko en general lo wòrdu informá.



No opstante kambio di nòmber, e kolaborashon entre Cultuurfonds Hulandes i PBCCG ta keda fuerte.



MONCHI & TONCHI

Tonchi, kunukero ku pèrmit por tira kachó mata

Awèl si, mihó bisti Tadema un 'muilkorf' promé e tende esei



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcedencia

Redakshon
Papi Antoin
Edson Pietersz
Ibi Piar (deporte)

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòi Antoin
786-6818

Aviso
avisobon@gmail.com

Servillia Mercera a selebrá 100 aña

Servilia Selestina Mercera-Sint Jago a kumpli 100 aña. E selebrashon a tumá lugá na Kas di Kuido, kaminda e ta permanesé. Pader Baak tabata presente pa asina a bendishoná e kumpleañera, miéntras Grupo Tutti Frutti a sòru pa e parti musikal.



Boneiru ta haña propio plan di klima

KRALENDIJK – A dura presis seis luna, pero djamars Sekretario di Estado Alexandra van Huffelen, na nòmber di e ministernan Harbers

di I&W i Jetten di EZK, tòg a bini un reakshon di e gabinete riba e rapòrt ‘Het is nooit te laat’ di Ed Nijpels tokante e mesa di klima Boneiru i a manda

esaki Tweede Kamer.

Ta trata un propio plan di klima pa Boneiru, Sint Eustatius i Saba, den kua ta bin pará kon e islanan mester prepará nan mes riba e konsekuensianan di kambio di klima.


Van Huffelen a anunsiá ku spesífikamente pa Karibe Hulandes ta organisá sosten for

di Reino ku un punto di kontakto fiho. Ku esaki Gabinete ta mira su ròl pa tantu e organisashon Hulandes pa investigashon sientífiko, NWO, komo komisario Delta ya aktivo na Hulanda.

Formashon di desishon tokante e finansiamentu, Gabinete ta skùif pa

e siguiente Gobièrnu. Adelantando riba esaki, ya ta pone un mion euro disponibel pa kuminsá ku e prosesonan.

Remarkabel ta ku den e reakshon di Gabinete, ta enfatisá mas biá riba e importante pa reforsá supervishon i mantenshon di òrdu riba e islanan.



Nathaly Evertsz definitivamente hefe di redakshon

KRALENDIJK – Nathaly (Netty) Evertsz definitivamente a bira hefe di redakshon di BONERIANO, e úniko korant di papel boneriano, fundá na aprel 2020. E ta remplasá asina Bòl Antoin, kende a para na kuna di nasementu di BONERIANO, un korant ku a surgi for di Extra na inisio di e periodo di Covid.

Nathaly tin un trayectoria di masoméno 4 aña den periodismo.

Un karera ku a kuminsá na 2019 ku un kurso serka Jean Mentens (NTR/Caribisch Netwerk), basá

riba un beka ku el a haña.

Bòl Antoin a gui'è na Boneiru. For di kuminsamentu Nathaly a traha komo stazjèr i despues periodista na BONERIANO i Extra. Awor el a skohe pa e funshon di hefe di redakshon di BONERIANO.

“Mi ta konvensí ku prensa ta hunga un ròl sumamente importante den demokrasia. Alabes ta empoderá un sosiedat. Mi sa ku e reto aki no ta fásil ni perfekto. Pero mi ta kla pa enfrent'é ku pashon, balor i e koutela nesario”, Evertsz ta bisa.



Paga tinu buraku riba kaminda

KRALENDIJK- Automobilstanan mester ta atvertí. E burakunan riba kaminda di Rincon ta forma peliger pa tráffiko. Despues di yobida di áwaseru e burakunan aki ta yena ku awa i ta bira difísil pa mira nan. Lokual ta hasi e situashon mas peligroso.



Rijkdienst Caribisch Nederland

VAKATURA

Bo tambe ke traha pa RCN? Bo por solisitá pa e siguiente funshonnan:

- KPCN - *Konsehero Sénior di Maneho pa Hefe di Kuerpo Polisial i Hefe di Operashon Polisial*
- BCN - *Direktor Finansiero (CFO)/ Direktor Suplente*
- KNMI - *Opsevadó (2fte)*
- OCW - *Hefe di Departamentu*

Mas informashon?

Bishitá www.rijksdienstcn.com/vakatura

The most complete payroll and HR software in the Caribbean!

Payroll Pro
HRM

Download the mobile app!

www.payrollprohrm.com

40 aña misa di Martin de Porres riba Seru Papaya/ Fortuna

Skibi pa Anthony Haile

Dia 23 di Òktober di e aña aki Misa di San Martin de Porres a kumpli 40 aña. Pero komo djabièrnè 3 di Novèmber ta fiesta di San Martin de Porres, Patrono di parokia di e misa, a disidí ku ta kombiná tur kos hunto i selebrá tantu e fiesta patronal komo e 40 añanan riba 3 di Novèmber.

E misa lo mester a keda hasi pa nos Obispu Mgr. Luis Secco, pero e a notifiká Pastor Ronald ku e mester a bai Roma urgente. Pastor a bisa ku ta un biahe pa algu positivo i mesora e rumor a lanta ku kisas nos Obispu ora e regresá Kòrsou tin un bon notisia pa nos Diósesis, ken ta bai bira nos próksimo Obispu pa rem-

plasá Mgr. Luis Secco. Ban spera i resa ku esaki ta e kaso. Pastor Ronald a haña yudansa di Pastor Jorge kende a enkargá su mes ku e predikashi. Pastor Jorge a duna algun ehèmpel di e bida di San Martin de Porres. Den e tempu ku e Santu aki tabata biba no tabata fásil pa un hende di kolo drenta un konbento pero Mar-



Pastor gradisiendo tur hende



Entrada di San Martin de Porres



Fielnan presente



Santu Safrifisio di Misa.



koleganan.

Kor The New Horizon a sòru pa e parti musikal. Un hóben a kanta na final un Ave-maria di un manera úniko ku a dun' é masha hopi aplouso.

Ora tin fiesta mester tin salu i bolo. Ta p'esei despues di misa tur hende por a pasa pa tuma esaki i tambe disfrutá di dos banda ku a bini pa animá tur hende.

Pa Pastor Ronald ta di dos biaha ku e ta pastor na Seru Papaya i e ta realisá ku tin hopi kos pa hasi pero e ta konfia ku poder di Dios e ta logra tur e kosnan ku e a pone su dilanti

pa hasi.

Promé ku misa a kuminsá tabata tin un proseshon chikitu ku e imágen di San Martin de Porres den e kayanan di Seru di Papaya, ku sigur tabata algu bunita. Áwaseru a kooperá hopi bon ku e proseshon por a tuma lugá sin ningun problema.

Un pabien na e komishon organisadó di e fiesta di 40 aña i tambe na Pastor Road ku ta trahando inkansabelmente na bienestar di e misa i su hendenan.

Riba e potrètnan por mira kon e misa a transkurí.



tin a logra i e tabata un ehèmpel di humildat huntu ku su otro



Religiosonan tambe tabata presente.

STATIA/SABA/ST. MAARTEN

Renobashon kompromiso mehorashon derecho di mucha

ORANJESTAD (EUX) – Statia a djòin su islanan ruman di Karibe Hulandes, meskos tambe Hulanda, den renobashon di su kompromiso pa mehorashon di derecho di mucha.

Komisario di Gobièrnu, Alida Francis i ofisialnan di Aruba, Boneiru, Kòrsou, Saba, Sint Eustatius, Sint Maarten i Hulanda, a firma e memorandum di entendimentu ku ta bai forma e base di koperashon riba implementashon di derecho di mucha.

E partidonan a bai di akuerdo pa kompartí konosementu i ekspertis

i pa desaroyá un plan di trabou pa e grupo di trabou di Reino pa derecho di mucha, meskos tambe un plan di akshon individual pa e isla i paisnan.

Tambe a bai di akuerdo pa monitòr e progreso di e plannan, ku énfasis riba guia positivo, prevenshon di abuso i mucha, desaroyo netwerk seif, partisipashon hubenil, aksesu na servisio profeshonal i atenshon pa muchanan vulnerabel.

A firma e memorandum di entendimentu resientemente durante e konferensia di tres dia ‘No Mas’, tokante violensia doméstiko i abuso di

mucha di e seis islanan di Kòrsou. E memorandum efektivu te promé di Karibe Hulandes, tené na di entendimentu ta keda novèmber 2028.



Nesesidat urgente sel di Polis

PHILIPSBURG – E ministerio di hustisia ke klarifiká e distinshon entre sèl di Polis i fasilidatnan di detenshon, e konteksto históriko i e desishon resien ministerial pa sèlnan di Polis bou di maneho di e

kuerpo polisial. E desishon akí ta vital i ta kita e preshon riba Point Blanche Prison, miéntas ta sigurá siguridat pa e komunidad.

E sèlnan akí ta kambenan sigurá den e stashon di polis kaminda

ta detené sospechosonan temporalmente, pero no mas largu ku 10 dia.

E terminologia ta referí na tur lokalidat usá pa detenshon i por inkluí tambe prizòn, kaminda ta sera detenidonan. E asuntu di detenshon i kapasidat di sèl, a bin ta un preokupashon di hopi tempu na Sint Maarten. Na desèmber 2011, e èks minister di hustisia, Roland Duncan, a bini ku un regulashon ministerial pa atendé ku e falta di kapasidat di sèl i

renobashon di e prizòn na Point Blanche.

E desishon akí a designá un sentro di detenshon na Philipsburg ku e meta pa persekushon seif i efektivu i prevení huimentu di sospechosonan di krimennan serio. Den e desishon ministerial resien, Minister di Hustisia, Anna Richardson, a disidí di drecha e sèlnan di Polis den nan forma original. E perspektiva di derecho humano internashonal i e falta di personal dentro

di Point Blanche Prison i Miss. Lalie Center, tin mester di e kambio akí.

Minister Richardson ta tuma siguridat di e komunidad di Sint Maarten hopi na serio. Siguridat di tantu e personal dentro di e prizòn komo e komunidad ta na promé lugá. Koperashon entre e manehonan di tantu Polis i Prizòn, ta esensial pa sigurá ehkushon efektivu di nan ròlnan i responsabilidatnan den mantenshon di un sosiedat seif.



Pa promové Sint Maarten den region Karibense

Ofisina di Turismo a firma kontrakt ku IMBRACE Group

PHILIPSBURG – Ofisina di Turismo di Sint Maarten a firma un kontrakt ku Jacqueline Louis, doño di IMBRACE Group, pa promové e isla den e region Karibense.

IMBRACE, un empresa lokal di merkadeo, ku a bin establese na Sint Maarten pa mas di 15 aña, a bin ta traha ku diferente negoshi grandi i organisashon na St. Martin, Karibe,

Estádos Unídos i Europa. Gianira Arrindell, direktor di merkadeo di Ofisina di Turismo, a bisa:

“Nos ta yama bon biní na IMBRACE Group serka nos tim. E akuerdo lo hunga un ròl krusial den solidifikashon di presensia di e isla den e merkado Karibense.

Ku presensia di Jacqueline Louis i su tim, nos ta plania riba

okumentá konsientisashon di destinashon dor di kasonan spesífiko.”

CEO di IMBRACE, Jacqueline Louis, entusiasamá a kompartí lo siguiente: “Nos ta hopi agradesidu na Minister Lambriex i e tim di Ofisina di Turismo pa konfia den nos ku e oportunitat bunita akí pa merkadeá nos dushi isla ront Karibe.”



HULANDA

Komishon di Integridat ke suspendé tres Parlamentario

DEN HAAG – E komishon ku tin supervishon riba integridat di Parlamentarionan, ke suspendé e Parlamentarionan Baudet, van Meijeren i Jansen, di Forum voor Democratie (FVD), pa shete dia for di reunionnan di Tweede Kamer. Nan por vota sí ainda. E tres Parlamentarionan no a tene nan mes na reglanan di komportashon, pasobra nan no a registrá un funshon ousiliar serka Tweede

Kamer. Ta trata di un funshon di maneho serka e empresa di distribushon di kuminda Eerlijk Eten.

Segun e komishon, ofisialmente yama Kolegio di Investigashon di Integridat di Tweede Kamer, e tres Parlamentarionan mester haña sanshon tambe.

Presidente Bergkamp, na nòmber di e presidio, a manda e konseho di e komishon pa tur Parlamentario. Tweede Kamer ta ku resès di elekshon i lo vota riba e

proposishon akí te dia 12 di desèmber numa.

E ora ei tin un Tweede Kamer nobo instalá. Chèn ta grandi ku lo bolbe skohe Baudet, Jansen i van Meijeren, pasobra nan ta haltu riba lista di PVD, number 1, 2 i 3 i e partido den enkuesta ta mustra ku e ta pará riba kuater asiento.

Esaki ta di dos biá ku e komishon di Tweede Kamer ta konsehá pa suspendé miembronan di Parlamento di Forum voor Democratie. E biá anterior tambe, na

òktober 2022, tabata trata di Baudet. El a nenga despues di diferente petishon pa mèldu un funshon ousiliar serka Amsterdam Media Group BV. Un mayoria grandi, 119 pro kontra

dos kontra, a vota. E kolegio di investigashon di integridat di Tweede Kamer no ta konsistí di Parlamentarionan, pero dor di tres eksperto independiente.



Prins Bernhard Cultuurfonds ta kambia pa Cultuurfonds

HULANDA -- Prins Bernhard Cultuurfonds desde awor yama Cultuurfonds. Esaki e organisashon ta laga sa via X. “Ku respèt i balor pa e

pasado, desde awe e fondo kultural ta bai mas aleu ku un nòmber ku ta kuadra ku kende awor nos ta i ku fokùs riba nos kontenido,” direktor Cathelijne Broers,

a bisa. E fondo ta sostené proyektonan riba tereno kultural i protekshon di naturalesa na Hulanda.

E ya favesidu Prent Bernhard na 2004, luna

pasá a bini den notisia pasobra a haña su karchi di miembresia original di NSDAP. Te na su morto el a desmentí ku e tabata miembro di e partido Nazi. E karchi tabata den un archivo privá di e prens, kende a muri na 2004. Eks direktor archivo di Kas Real, Flip Maarschalkerweerd, a haña e karchi na Paleis Soestdijk, despues ku el a inventarisá favesimentu di Bernhard. Prins Bernhard Cultuurfonds den un reakshon mesora ya a laga sa ku e ta sorprendé ku e notisia. “Nos ta sorprendé ku e anunsio i e eksistencia di e dokumento,” e fondo ta laga sa den un reakshon. “Nos ta bai pone riba un rei kiko e notisia akí ta nifiká pa nos komo fondo kultural.”

idiologia di nashonalismo i rasismo ekstremo. Algun aña despues momentu ku Segundo Guerra Mundial a kuminsá na 1936, Bernhard a entregá su miembresia. Den e aña ei el a komprometí ku Prensès Juliana, wela di Rei Willem-Alexander. Durante e fiesta huéspetnan Aleman tabata presente. Prens Bernhard pues nunca a destruí su karchi di miembresia.

E fondo, anteriormente konosí komo Prins Bernhardfonds i Anjerfonds, ta eksistí desde 1940. Tempu ku guerra tabata andando algun luna, na London a lanta Spitfire Fund pa kumpra materialnan di guerra. Desde inisio Prens Bernhard tabata enbolbí. Desde e fin di guerra, e plaka ta destiná pa kultura i protekshon di naturalesa.



Muhé na estado avansá seriamente heridá durante atrako

CAPELLE AAN DEN IJSEL – Un muhé na estado avansá, a resultá seriamente heridá durante un atrako na Capelle aan den IJssel. Un atrakadó a dal’é riba su kabes, dor di kua e muhé e kai riba su barika i kabes. E beibi den su barika parse no a sufrí daño. Polis ta buskando e kulpabel òf kulpabelnan. E muhé di 33 aña tabata na kaminda pa kas despues di a hasi deporte. Banda di kuartu pasá di

ocho el a baha for di metro na e stashon Capelsebrug. Algun mas despues, nèt despues di un brùg na Bizetstraat, el a keda atraká di patras i a batié riba su kabes.

E muhé a tende un hende bisa ku e mester dun’é sèn. Despues a kita su telefòn i un atrakadó a kore bai. E muhé tabata kana desorientá ku su kara na sanger den e barío, Polis ta bisa. Ei nan hendenan a dun’é yudansa i a yama e

servisionan di ayudo.

A hiba a muhé hospital pa kontrolá su salú i e beibi den su barika. A stipulá ku e tabatin wesu kibrá na su kara dor di kua mester a oper’é.

Polis ta en buska di testigu i imágennan di kámara. Tin falta e señalamentu di e atrakadó, pero un hende lo por a mira e víktima momentu e ku tabata kana pa kas.

Popularidat ta relativo
 P’esei un propio estilo
 No solamente pa ta eksitoso
 Sino sigur mas balioso

BròKèS 93.5 FM
 pokopoko pero sigur mas i mas hende ta ...

Skuch’è
 Telefon/ WhatsApp +599 701 0935
 www.radio935bonaire.com

ARUBA

Pader Jairo na Parlamentario Miguel Mansur

“Bo ta un persona cu a asumi un posicion c’un agenda stinki”

ORANJESTAD -- Pader Jairo den fin di siman, a pone un grabacion riba social media, den cual e ta reacciona riba Parlamentario pa fraccion di Accion21, Miguel Mansur, pa motibo cu e parlamentario aki a mete cu su persona.

Pader Jairo a cuminsa pa muestra cu bida no ta stop di sorprende su persona mas y tampoco e cachu cu rabo, e demoño tampoco ta stop di sorprende su persona manera e ta haci su cosnan.

Na su regreso for di Colombia caminda Pader Jairo a pasa algun dia den Convento Santo Domingo de Guzman caminda tabatin un congreso di Padernan predicado, el a wordo confronta cu algun reaccion caminda el tuma nota di un video di Parlamentario Mansur caminda a edita un video di Papa Francisco.

Un video edita caminda en berdad Pader Jairo ta muestra cu Papa Francisco a papia di inclusion, mustrand cu su Iglesia ta

Mama y Maestro, un mama cu ta cuida yiu y ta siña yiu, loke kiermen cu Iglesia no ta pone ningun hende un banda pero el a muestra cu e parlamentario aki a hinca e video edita den su contexto mustrand cu Papa mes lo ta di acuerdo cu e tema di Mansur.

Pader Jairo a sigui muestra cu e miembro di Parlamento aki ta pone e asunto di ‘spada cu spada’ den un contexto cu no ta cuadra, mustrand cu hamas y nunca, “nos Iglesia” ta bay pone un Pastoor di un pareha di hende homber. “No, nos no ta den e cos ey di spada cu spada, nos tin ritonan di matrimonio cu ta Sacramento cual cada hende mes ta ofrece otro, ta mara na asina tanto cos, specialmente na diseño di Dios.

Ami no tin nada contra di ningun hende, mi a un predicado di palabra di Dios y mi ta trata tur hende cu respet, cu bondad cu Pader Jairo na Parlamentario Miguel Mansur “Bo ta

un persona cu a asumi un posicion c’un agenda stinki” caridad y hamas y nunca di mi banda, sea e hende cu su ideologia, cu su pensamiento, semper mi ta trata nan cu respet.

Wak Mansur, bo ta un hende kende ta un mal perdedo, mi no sa kico mi pensa di bo, ya cu bo no ta mi amigo, mi no tin amistad cu bo, mi conoce bo famianan sigur di antes, pero cu bo mi no tin amistad. Awor diripiente bo ta hisa benta, pa bisa ami y mi colega Pader Curtis, cu nos ta gay y mi cu yama Pader Curtis pa puntra su persona si ta berdad, pasobra cu ta awe mi a haya sa cu mi ta gay, mi no tabata sa!

Mi sa cu mi ta Pader mas cu 20 aña, dos aña den Ordo di Dominicanan, pero mi no tabata sa e pida ey pero bo a trece esaki dilanti, anto e actitud ey ta haci cu bo ta un mal perdedo.

Bo ta cuminsa purba demoralisa mi pero yama mi kico cu bo kier, yama mi gay, yama mi pedofiel,

kico mas tin pa bo yama mi pero enfin ami sa kico mi ta! Awor mi sa di con bo ta yama mi gay ya cu mi no a core un paranda cu bo, ni spada cu spada, nada di e cosnan ey, mi no ta den e cosnan ey, pero si mi ta un hende cu ta trata tur hende, hasta esun cu ta gay, ta gosa di mi respet pasobra nan ta duna mi respet.

Abo ta un hende cu a asumi un posicion c’un agenda stinki, pa bo bin cu bo plannan di matrimonio y tur eseynan pero mi a tende cu bo a bay studia na Merca of kico bo a bay haci na Merca, pasobra mi a tende tambe kico bo a bay haci eynan y mi no ta husga bo pa esey.

Pero bo a hisa benta, bo no ta inteligente y como representante di pueblo mi no ta haya ta bon idea cu bo mester t’ey, pasobra bo ta arogante y mi ta scucha reunionnan di Parlamento, bo ta hisa benta pasobra bo pensamiento, bo ideologia pero ruman, si bo ta gay, ta bo asunto.

Si a priminti hendenan ey fo ta vota pa bo pa pone bo eynan, ya cu bo tin bo agenda, ta bo asunto pero ami personalmente no tin gana di mira bo mas den Parlamento, mi no kier bo representa ni ami y tampoco e pueblo aki, pasobra bo agenda ta stinki!

Awe ta matrimonio di homber cu homber, muhe cu muhe y despues lo bin pro abortus, despues pro pedofilia ya cu unabes bo habri un bentana, ya cu asina cosnan ta cuminsa, habriendo bentana pa cosnan scur y despues tur cos ta caba na aros con coco. Ami ta respeta tur hende, e hende como persona, e hende como yiu di Dios, e hende y mi tin amigonan cu ta gay pero abo Dios kier algo cu bo, y no kere cu e placa cu bo tin, si bo tin ainda anto, lo no yuda bo,” entre otro tabata e reaccion di Pader Jairo Maduro contra di expresionnan haci pa Parlamentario Miguel Mansur.

Prinses Beatrix ta bishita Aruba e siman aki

ORANJESTAD -- Dialuna mainta durante conferencia di prensa di Gobierno, Prome Minister Evelyn Wever-Croes a anuncia cu diahuebs awor, 9 di November, Aruba lo ta ricibiendo bishita di Prinses Beatrix. E bishita aki no lo ta igual

na e bishita di Rey Willem Alexander hunto cu Reina Maxima y Prinses Amalia, sino e lo ta un bishita mas cortico y intimo. Prome Minister a indica cu Prinses Beatrix ta biniendo Aruba riba invitacion di Dutch Caribbean Nature Alliance, cu lo ta acompaña su

persona pa bishita e otro islanan den Caribe.

E agenda pa e dia aki ta inclui bishita na Telefon pa Hubentud, y riba su propio iniciativa, Prinses Beatrix,

bishita un "speeltoern" pa wak con esakinan ta bay. Tambe, durante su estadia e lo participa na e congreso di DCNA cu lo tuma luga na Universidad di Aruba.

Premier Wever-Croes a expresa cu Aruba sigur ta honra cu e bishita di Prinses Beatrix, y lo ta presente pa salud'e den nomber di henter e pueblo di Aruba.



BISHITA DI
Prinses Beatrix

ARUBA

Joselin Croes ta asumi su posicion entrante prome di december

ORANJESTAD

-- Durante conferencia di prensa di Gobierno, Prome Minister Evelyn Wever-Croes a anuncia cu Arubahuis lo tin su director nobo pa comienso di December 2023. Pa cu e posicion aki, a cuminsa un proceso di nombracion na Juni 2022, cu a culmina na November 2023, den un decision na favor di sra Joselin Croes.

Manera ta conoci, Arubahuis ta representacion di Aruba, na Hulanda, y e mision di Gobierno pa Arubahuis ta pa tin un Aruba visibel na Hulanda, den Reino y na Europa. Pa logra esaki e meta aki, Aruba tin su Minister Plenipotenciario, den



number di sr Ady Thijsen, y awor un director nobo, cu ta sra. Joseline Croes.

Prome Minister a splica cu e nombramento di sra Joselin Croes tabata un vacatura cu a wordo publica den Juni 2022. Gabinete Wever-Croes basa riba integridad, a tuma e decision di no haci e nombracion aki uno politico, manera

añanan anterior, sino habri e vacatura pa diferente candidatonan por solicita, ya cu pa sirbi e vision y mision di Arubahuis miho, ta necesario pa tin un persona eynan independiente di cua Gobierno ta sinta.

Pa cu e proceso di nombracion, Gobierno a introduci un comicion cu tabata encarga cu e proceso

aki, cu tabata consisti di Departamento di Recurso Humano, Departamento di Impuesto y un representante di Ministerio di Asuntonan General.

Un total di 23 persona a solicita, y basa riba e criterionan, a escohe 3 candidato, cu a bay door di un entrevista na unda cu a escohe sra. Joselin Croes como e miho candidato pa e posicion aki.

Na oktober 2022, e comicion a aserca Prome Minister, cu ta encarga cu Arubahuis, pa presenta e proposicion aki, y na Februari 2023, e proposicion aki a wordo aproba pa Consejo di Minister. Despues di esaki, a haci algun investigacion mas, incluyendo esun di Veiligheidsdienst, cual tambe a sali positivo.

Prome Minister a splica cu sra. Joselin Croes ta actualmente e Minister Plenipotenciario pa Aruba na Washington. Durante e ultimo cinco añanan, sra Croes a traha hopi duro riba promove y crea oportunidadnan pa Aruba y pa Arubianonan, cu partnernan na Merca. Akinan riba e terenonan economico, innovacion, cultural, enseñansa y tambe area diplomatico. Un di e metanan principal di sra Croes tabata pa Aruba fortifica lazonan cu Merca

y Canada, y pa saca mas probecho posibel di esaki.

Sra Croes prome cu su funcion na Washington tabata Chief of Staff di Minister di Husticia, y prome cu esey e tabata tin su propio oficina di abogado. Aparte di ta abogado e tin aworaki tambe su Masters Degree den Environmental Management.

Sra. Croes ta conoci pa su determinacion, positivismo, pasion, y disciplina pa logra su metanan. E ta domina 4 idioma y tin e curiosidad pa siña mas idioma y cultura di otro paisnan.

"Mi ta desea sra. Joselin Croes hopi exito, den e funcion nobo aki, cu el lo cuminsa December proximo. Tambe mi kier gradici sra Glenda Hernandez cu a tuma e encargo di director interino pa un periodo mas largo di loke nos a pidie na comienso. Señora Hernandez a sa di trece estabilidad y tranquilidad na Arubahuis, y pa esaki, nos ta gradici su persona. Cu e nombracion di e director nobo, Arubahuis ta laga un periodo dificil atras, y ta sigui cu positivismo padilnati. Di mi curason un danki na tur empleado y staff completo di Arubahuis pa tur nan esfuerso y dedicacion," Prome Minister a expresa.

Iglesianan Cristian di Aruba

Aruba no ta discrimina contra comunidad LGBTQ+

ORANJESTAD

-- Dia 3 di november un gran cantidad di ciudadano a subi caya pacificamente pa muestra gobierno cu mayoria di e pueblo di Aruba kier mantene matrimonio como un aliansa entre un homber y un muhe den nos leyman. Di otro banda ta un grupito chikito ta duna hopi publicidad na y ta haya hopi publicidad pa e causa di e comunidad LGBTQ+.

Corte di casacion na Hulanda tin un veredicto di Hof den discusion y den Parlamento di Aruba tin un proposicion di ley den discusion. Loke ta den discusion ta si dos persona di e mesun sexo tin e derecho di casa cu otro na Aruba.

Corte Europeo pa Derecho Humano, e corte mas halto di

mundo den asuntonan di derecho di hende, a dicta caba cu un pais cu nenga parehanan di mesun sexo e derecho pa casa no ta discrimina.

Aruba su codigo civil no ta discrimina parehanan di mesun sexo pasobra Corte Europeo pa Derecho humano a dicta cu casamento di hende di mesun sexo no ta igual na casamento di un homber y un muhe. E veredicto aki ta e hurisprudencia pa aplica den e caso actual di casacion di Pais Aruba.

Den e veredicto di Hof e huesnan a argumenta cu no tin documentacion cu mayoria di e pueblo ta contra matrimonio di personanan di mesun sexo. Pero e echo cu un gran cantidad di ciudadano a subi caya na un forma pacifico pa defende matrimonio original mester ta

suficiente motibo pa Gobierno busca pa sa kico mayoria di pueblo ta opina.

Basa riba leyman existente e Corte di mas halto di derecho humano no ta obliga Aruba legalisa matrimonio di mesun.

E unico motibo valido pa Parlamento legalisa matrimonio di mesun sexo ta si mayoria di nos pueblo den Iglesiasian Cristian di Aruba Aruba No Ta Discrimina Contra Comunidad LGBTQ+ un referendum organisa pa Gobierno scoge pa reconoce e relacion entre dos persona di mesun sexo como matrimonio.

E decision aki mester ta den man di henter nos pueblo y no den man di un mayoria di casualidad den Parlamento.



Ku Fontys Hogescholen na Hulanda

Kòrsou ta enfatisá na koperashon intensivo

WILLEMSTAD – E ministerio di enseñansa di Kòrsou ta hasi esfuerso pa un koperashon mas amplio ku Fontys Hogescholen na Hulanda, esaki a sali na kla durante un bishita di Minister Sithree van Heydoorn i un delegashon na e edukashon di dosente di Fontys na Tilburg e siman ku a pasa.

E kantidat di studiante Karibense na Fontys ta krese, apesar ku den sentido apsoluto ainda ketu bai ta chikitu, un tendensia ku pa studiantenan Kurasoleño ta komo un preferensia di e popularidat di Hogeschool Rotterdam. E omento ta medio danki na e demanda grandi di edukashon na

Ingles.

Kennedy Tielman, dosente Karibense na e edukashon di dosente, ta fungi komo anfitrión kaminda e ta pasa den diferente tema. A papia tokante e retonan di e studiantenan Karibense na Fontys, manera barera di idioma, diferensia kultural, e distansia di kas i e posibilidatnan pa hasi eskoho di estudio, pero tambe e eksperensianan positivo.

Tabatin atenshon spesial pa e ocho studiantenan master Karibense ku ta sigui nan estudio digital, for di e islanan. Via un konekshon di video, nan ta enbolbí na e enkuentro,

nan ta haña gradisimentu di nan dosentenan pa nan esfuerso i kreatividat, prinsipalmente pasobra nan ta sigui e lèsnan apesar di

e orario, te asta sí nan ta tuma lugá mitar di kuater di mardugá ora Karibense.

Minister Van Heydoorn tabatin un sorpresa pa e

studiantenan, el a firma e dokumento ofisial ku ta sòru ku e ministerio ta kubri nan plaka di estudio completamente.



Pa pasahero na Hòfi Mango

Corendon ta hasi donashon di un florin pa pasahero

WILLEMSTAD – Ku e di palu di palma partikular, plantamentu di un kantidat Corendon a anunsiá



djadumingu ku e ta hasi donashon di un florin pa pasahero na Hòfi Mango, un èks plantashi i entretantu área di naturalesa protehá riba e isla.

E parke ku Jandino Asporaat a kumpra no ta solamente un parke di naturalesa, pero tambe un lokalidat ku komo meta pa mehorá e outosufisiensia propio di habitantenan di Kòrsou.

Ku e donashon anual,

por amplia i desaroyá Hòfi Mango mas aleu. Ta hasi uso di e plaka entre otro pa mantenshon i plantamentu di palu indígena i tipo di mata den e parke.

Atilay Uslu, fundadó di Corendon, a bisa ku e parke ta un sitio di brui pa desaroyo ekonómiko, ku edukashon pa studiantenan, programanan di skol i plannan pa produkshon di fruta i berdura.

Corendon ta kurashá su

pasaheronan pa kontribuí boluntario.

Esaki por durante un bishita na e parke, òf via di e website di Hòfi Mango.

Andino Asporaat: “Nos ta hasi bon uso di e donashonnan.

Por ehèmpel ainda tin plannan pa mehorashon pa rekohé awa, ponementu di kuránan nobo i un lokalidat pa aktividatnan kultural.

Ketu bai problema ku servisio di Imigrashon

WILLEMSTAD – E maneho di imigrashon di Kòrsou mester bai di un otro manera di kontrol riba turista, segun Minister di Asuntunan Ekonómiko, Ruisandro Cijntje. E notisia ta bini den lus despues di kehonan resien tokante a trato ku turistanan Kolombiano ta haña na Hato.

Minister Cijntje ta enfatisá riba e interes di turismo pa ekonomia i e

nesesidat pa minimalisá e sufrimentu di bishitantenan prinsipalmente di Colombia. Un reunion benidero ku e minister di hustisia, Shalten Hato, mester dirigí su mes riba e manera ku ta atendé ku turista na Hato, siguiendo kehonan di e agensia di biahe Johana Restrepo, tokante resepsion no amikal di su paisanonan.

E diskushon tokante e sistema ku Imigrashon ta

atendé ta di hopi aña. Un kaso den Korte kontra un di e ántenarnan di Imigrashon pa mal uso di su funshon, a duna un bista kon e servisio ta atendé ku turista.

Ounke ku e tempu ei a atendé ku e ántenar riba diferente punto, a originá un bista kla di e servisio di Imigrashon kaminda mal komprendementu parse ta normal.

E problema ta keda reforsá dor di e

resultadonan di Raad voor de Rechtshandhaving, ku desde 2013 na mas

okashon a musta riba iregularidatnan na e kontrol di frontera.



DEPORTE

Resultado bolas 'Kingdom Games Bonaire 2023'

KRALENDIJK -- di kuater lugá a resultá St. Djadumingu a tuma e partidonan final den e diferente deportenan pa 'Special Olympics Kingdom Games'. Un pabien na tur e ekiponan ganador i sigur un pabien na e ekipo di bolas Bonaire 1 ku a titulá kampion.

Pa loke ta e otro resultadonan pa ku bolas, e ekipo di Korsou2 a sali supkampion, e di tres lugá a bai pa e ekipo di Saba,

di kuater lugá a resultá St. Maarten, di sinku lugá a bai pa e ekipo di St. Eustatius, na di seis lugá Aruba, na di shete lugá Korsou1 i na di ocho lugá a keda e ekipo di Bonaire2.

Pa straño ku por parse e organisashon enkargá ku organisashon di e evento, ounke ku a primintí, te ainda no a manda e resultadonan di e otro kategorianan di deporte.



MI FAMIANAN

Pa: Bòi Antoin

Mi tin hopi famia. Hopi di nan no sa mes ku nos ta famia. Den e seri aki riba djárason den BONERIANO mi ta skirbi di nan, tantu famianan di parti mi tata komo mama.


Bambam Nicolaas

Bambam Nicolaas tambe ta mi famia. Si mi no ta kiboká, Bambam su nòmber mes ta Urbano. Ta un persona ku un profil di kara ku ta reda su desendensia indjan. E ta di e bario Nort di Saliña, konosí komo 'bario di indjan'.

Kon Bambam ta toka mi na famia? Pa ta mas simpel mi por splika ku mi bisawelo Leonardo Antoin, un anterior katibu di Felix Anthony, ta bisawelo tambe di e mama di Bambam, kende ta Petra Nicolaas-Anthony. Un di e yunan di Leonardo Antoin i Pieternella Francees tabata Pieternella Antonia Antoin (Ma Chon), kende a kasa ku Josephus Hermanus Salsbach (Pa Bubu). Nan yu mayó tabata Isabel Salsbach, kende a kasa ku John Anthony.

For di e matrimonio John i Isabel (Chabe) a nase entre otro Miguel, Papachi, Buchi Can i tambe pues Petra, kende a kasa ku Geronimo Nicolaas (Sabí). Bambam su ruman hòmbler mas grandí kuné Virgilio (Kòrá) tabatin un konosido futbolista (kipèr).

Bambam ta taksista aktualmente. Den pasado el a traha den restaurantnan riba e isla aki komo weiter. Pues ta un persona ku a move hopi ku turista ku ta bishitá e isla aki.



6.2" Pioneer DVD Touchscreen

\$195

1TB Portable SSD Drive

\$124



STARTING AT **\$229**

Samsung and Apple watches with warranty and support



CityShop

Smart shopping ▶ Better living

END of
**YE
AR**



15.6" HP Laptop
AMD Processor
8 GB RAM
Windows 11

SPECIAL PRICE

\$489

OFFICIAL STORE



Gift backpack included



HP Wireless Printer

SPECIAL PRICE

\$79

PC Speakers w/
Wireless Control

\$129

